

INUIT ATAQATIGIIT

Inatsisartuni



UKA 2018/pkt.nr.186
Ulloq 7. Oktober 2018
Stine Egede

Uunga siunnersuut: Avatangiisinut aningaasaateqarfik pillugu Inatsisartut inatsisissaat nr. xx, xx. xxx 2018-imeersoq

(Naalakkersuisut Siulittaasuat)

Inuit Ataqatigiinniit Naalakkersuisut siulittaasuata aalajangiiffissatut siunnersuutaanut imaatumik oqaaseqassaagut.

Siullermik nuannaarutigaarput avatangiisitta eriaginerulernissaanut siunertalimmik siunnersuuteqartoqarnera, tamannami Inuit Ataqatigiinni pingaartilluinnagaraarput, nalunngilarpummi nunarput paarilluartariaqaripput, nunami manna, maanna inuuffigisarput kinguaassatsinnut ingerlateqqikkusupparput mingutsinneqanngitsaq, aserorterneqanngitsorlu.

Ullumikkullu killiffipput qiviarutsigu, ajoraluartumik immitsinnut annertuunik suliakkersorsimavugut, ilaatigut eqqarsarluanginnerup, akisussaaffimmillu tiguserusunnginnerup kingunerisaanik eqqagassarpasuit nunami sumi tamaani, sissami imartatsinnilu piulersimapput.

Tamakkua iluarsiiiffigissagutsigit aningaasarpasuit atortariaqarpagut, taakkulu periarfissat ilaatigut aningaasaateqarfimmik pilersitsinikkut aqutissiuunneqassapput.

Siunnersuuteqartup oqaaseqaatigisamini oqaatsit atugai Inuit Ataqatigiinni isumaqatigilluinnakkavut annertuumik taperserpavut imaattut: *"Inuiaqatigiittut kinguaassatsinnut, avatangiisimik pinngortitamillu ingerlatitseqqittussanut akisussaaffeqarpugut"*.

Qujanartumik nunatsinni eqqaaveqarnikkut aaqqiissuteqarniarluni kommuunini ilungersortoqarpoq, tulluussimaarnarporlu kommunit tallimaasut suliniummik angisuumik maanna pilersaarusiuleruttormata eqqagassalerinikkut siunissami pinngitsoorani sunniuteqaleriartorumartumik. Taamaakkaluartoq sulii suliaasat annertoqaat, ingammik nunarput taamak isorartutigitillugu, inoqarfiillu avinngarusimasumiittut eqqaaveqarnikkut atugaat akuersaarneqarsinnaatinnagit. Nalunngilarpummi eqqagarpasuit nunamut imaanullu teqqartarput, ingammillu savimerngit, minnerunngitsumillu plastik-kikut annertuumik mingutsitsisarput, ukiorparujussuarnilu mingutsitsisarlutik.

Ikuallaaviit pitsaasut illersorneqarsinnaasullu pisariaqartippavut. Anartarfinnullu eqqaaviit sulisunut ulorianartorsiortitsinngitsut, plastik-kinillu imaanut eqqaaneq akuersaaginnarneqarsinnaanngillattaaq.

Nunap immikkoortuini misileraalluni eqqakkanik poortuissutit aallarnisaleruttorput, tamassumalu iluatsilluarnissaa tamatta akisussaaqataaffigaarput, tamatsinnummi siunissamut iluaqutaalerumaarmat. Motoorilinnik suugaluartunilluunniit atorunnaarnikunik passussineq aqqissuusaanerulersittariaqarparput, nunamummi eqqaaginnartarneq akuersaarneqarsinnaanngilaq illersorneqarsinnaananilu. Suliffiutillit, piniartut, aalisartut, uumasuutillit il. il. peqataatinneqarnissaat pinngitsoorsinnaanngilaq. Minnerunngitsumik tamatta angerlarsimaffeqartugut illuinnarniikkutta inissiaarsuarniikkutta, illoqarfinniikkutta nunaqarfinniikkuttaluunniit pinngitsoqarata akisussaaffeqarpugut.

Meerartatsinnut maligassiuinissarput pisussaaffiuvoq annertooq. Taamaattumik inersimasut sunut tamanut eqqaasarnerput, mininnagulu oqaatigerusuppara cigarittit kimmivikuinik maangaannaq eqqaasarneq assersuutissaqqimmat, maligassiuinnginnermut.

Nunatta avatitsinnut nittarsaannerani oqariartortarpugut nunarsuarmi minguinnepaamik najugaqarluta, taamalu oqartarneq ilumoortunngortissallugu tamatta pisussaaffeqarpugut.

Missingersuutitaqanngitsumik akitsuusersuiniarneq Inuit Ataqtigiinni akuersaanngilarput.

Akitsuutit tassaasarmat ersinngitsumik akileraarutit siullertut sulisartukkormiunut equinerlunnerpaasarput tamannalu Inuit Ataqtigiit tapersersussanngilaat.

Ataatimiititaliap suliareqqissaarlugu, peqqissaarullugulu suliarissagaa kissaatigaarput.

Neriuppugut aningaasaatit allaffissornerujussuarmit nungusarneqarpallaaratik siunertarmut atorluarneqarumaartut.

Taamatut oqaaseqarluta Inuit Ataqtigiinniit siunnersuut taperserlugu ataatimiititaliamut susassaqartumut suliareqqitassanngorlugu ingerlateqqipparput.

Qujanaq